

27/08/1998

PM akan hadir NAM ke-12

KUALA LUMPUR, Rabu - Datuk Seri Dr Mahathir Mohamad akan menghadiri Sidang Kemuncak Pergerakan Negara Berkecuali (NAM) ke-12 selama dua hari di Durban, Afrika Selatan mulai 2 September ini bersama 112 pemimpin negara anggota yang lain.

Perdana Menteri akan diiringi Menteri Luar Datuk Seri Abdullah Ahmad Badawi, pegawai-pegawai kanan Wisma Putra, Jabatan Perdana Menteri dan Suruhanjaya Tinggi Malaysia di Pretoria.

Menurut satu kenyataan Wisma Putra di sini, sidang kemuncak Durban akan meninjau situasi antarabangsa, kaitannya dengan pencapaian NAM bagi membolehkannya mengatur strategi untuk menghadapi cabaran alaf akan datang.

Sidang kemuncak NAM diadakan tiga tahun sekali dan yang baru lepas ialah di Cartagena, Colombia pada 1995.

Ketua negara dan kerajaan NAM juga akan mengkaji semula aktiviti kerjasama mereka dalam bidang-bidang politik, ekonomi dan sosial bertujuan mencapai permuafakatan dan kesependapatan di Pertubuhan Bangsa-bangsa Bersatu (PBB) dan badan-badan antarabangsa yang lain.

Sidang kemuncak itu dijangka membincangkan isu-isu seperti peranan NAM, reformasi PBB, pelucutan senjata dan keselamatan antarabangsa, proses damai Timur Tengah, Semenanjung Korea, situasi di Afrika, krisis kewangan yang melanda sesetengah negara anggota, globalisasi dan risikonya terhadap negara-negara membangun, kawalan dadah antarabangsa, hal ehwal wanita dan hak asasi manusia.

(END)